

Seiz lij iq, gou mbouj rox daxmeh guh gijmaz hong, caenh rox de gingciengz caeuxcaeux couh okbae, daengz laep cij haeuj ranz. Mwhhaenx gou gig noix ndaej raen naj daxmeh, aenvih gou caengz hwnq, daxmeh couh okbae lo; gou ninz ndaek lo, daxmeh cij dauq. Ndaej hoengq seiz, gou couh cam daxboh: “Daxboh, gou haujlai nanz mbouj raen daxmeh lo, daxmeh bae guh gijmaz la?” Daxboh naeuj naeuj fajnaj gou, naeuz: “Daxmeh gig hungmbwk, de ndaej dawz aen singz raeuz bienq ndaej engq gyaunde, de dwg boux ‘hawsingz meijyungzsw’!” Dingq daengz gij vah daxboh, ndaw sim gou gig angq, caemh vih miz boux daxmeh yienghneix roxnyinh miznaj. Bingzseiz roeb vunz, gou cungj gig miznaj dwk naeuz: “Daxmeh gou dwg ‘hawsingz meijyungzsw’!”

Ciemhciemh, gou majhung lo, caemh roxdaengz daxmeh gizaed dwg boux sauqgai, ndigah, doeg siujyoz seiz, gou gig noix youq dangqnaj gyoengq doengzhag dwen daengz daxmeh. Miz baez ndeu, roengz dangz le, dou geij boux itheij lwnhgoj, lwnh daengz “gunghcwngzsw” aen swz neix seiz, Yangz Vaz saenzheiq dwk naeuz: “Meh gou couh dwg boux Gunghcwngzsw mizmingz ndeu!” Dingq de yienghneix naeuz, gyoengq doengzhag bouxboux cungj foenfoen naeuz meh bonjfaenh dwg guh gijmaz, gou ndwn youq gizhaenx mbouj gangj saek coenz. Sat le, miz vunz cam gou: “Gyah, meh mwngz dwg guh gijmaz la?” Gou doeksaet le, yaek gangj yaek mbouj gangj dwk naeuz: “Cam maguh gijmaz? Rox doengh gijneixdoiq sou miz gijmaz ndeicawq?” Gangj sat, gou ganjvaiq deuz lo, mbouj rox bouxlawz naeuz: “Geij cam de lo, gizaed daxmeh de dwg boux sauqgai ndeu!” “Boux sauqgai” Miz vunz sing sang dwk hemq naeuz, gaenlaeng, haujlai vunz cungj riu hwnjdaeu. Mwh haenx gou gig haemz, caen siengj ndoj haeuj ndaw cong hae bae ciengx-lwenx mbouj okdaeu, ndaw sim gig huj daxmeh: Guh gijmaz mbouj ndaej, bae guh boux sauqgai!

Daj mwh haenx hwnj, gou gagog



hwnjdaeu, mbouj caiq caeuq gyoengqdoh ganggang riuriu, caemh mbouj hawj daxmeh daeu hagdangz cimh gou. Mboujguen hai gijmaz hoih, gou cungj dwg hawj daxboh daeu.

Baez ndeu, yaek cuengqhag seiz, mbwn bienq laepcupcup, yaepyet fwnraq bongh roengzdaeu lo. Gou naenj: Sat lo, daxboh bae okcai, mbouj ndaej daeu ciep gou lo, bingzseiz gou cungj naeuz daxmeh, mbouj cinj de daengz ndaw hag dou, seizneix yaek baenzlawz baema ne? Cingqdang gou mbouj rox baenzlawz guh seiz, lauxsae byaij daeujdaengz henz ndang gou, ndaw fwngz de gaem aen liengj ndeu, naeuz: “Cingq nyap mboujmiz vunz soengq liengj daeu, mbouj rox baenzlawz guh? Dwg lwi?” Gou ngaekngaek gyauej, lauxsae ciep dwk naeuz: “Hawj mwngz, haxbaenh miz boux mehmbwk ndeu soemh fwn soengq daeu hawj mwngz” Gou gipmuengz cam: “O, de gangj gijmaz lwi?” “De caenh daengqnaeuz mbouj hawj mwngz soemh fwn hung baema, deq fwn haemq iq le menh baema ranz. De caen gvnsim mwngz, bonjfaenh deng dumz liux lo, lij mbouj guenj, fanj gvaqdaeu dwg lau mwngz deng dumz.” Lauxsae gangj coenz vah neix sat le, couh byaij okbae lo, gag louz gou youq gizhaenx dauq-engeix

Fwn menhmenh bienq iq lo, gou ganjgip buet bae ranz. Gou nyinh-naeuz daxmeh itdingh youq ranz, hoeng, gou yamq haeuj bakdou seiz, ndaw ranz caemrwgrwg, caengz raen gij ngumhngaueuz daxmeh. Fwn caengz dingz, de bae gizlawz ne? Gou ngeix dwk. Nanzdauh lij bae sauqgai? Gou doq siengj doq byaij ok bakdou, buet

bae gizdieg daxmeh bingzseiz sauq haenx

Daengz gizhaenx, gou dauqcawq ra gij ingj daxmeh, hoeng, baenzlawz hix ra mbouj raen. Dauqdaej youq gizlawz ne? Gou ngeix dwk. Suenq lo, lij dwg baema ba. Mwh gou byaij deuz, raen henz aen ci ndaem ndeu gvaengz haujlai vunz. Ok gijmaz saeh lo? Gou nyaenx mbouj ndaej byaij gvaqbae, caenx haeuj ndaw vunzlai bae, baez yawj, raen daxmeh ndwn youq gizhaenx, boux hauxseng ndeu cik fwngz ndeu vix daxmeh naeuz: “Mwngz suenq gijmaz doxgaiq, gamj loengh uq aen ci gou, aen ci gou dwg Baujmaej, danghnaeuz deng gvet va, mwngz boiz ndaej hwnj lwi?” Daxmeh ndwn youq gizhaenx, mbouj gangj saek coenz, caenh dingq boux hauxseng neix ndaq, “gou mbouj guenj lo, mwngz sikhaek swk cengh, mboujnex, gou naeuz lingjdauj mwngz nyi, hawj mwngz mbouj miz hong guh!” Dingq daengz neix, gou nyaenx mbouj ndaej lo, siengj cung hwnjbae, rag daxmeh baema, hoeng, mwh gou yamq din okbae seiz, daxmeh gangjvah lo: “Daegmbauq, dwg gou sauq mbouj siujsim, sauq naez sinz deng aen ci mwngz lo, gijneix dwg gou loek, doiq mbouj hwnj lo, mbouj yungh mwngz naeuz, gou cungjdwg wnggai swk cengh aen ci mwngz, hoeng, mwngz gangj vah caemh au miz cikconq, gou dwg boux sauqgai, mbouj loek! Hoeng, mwngz mbouj wnggai yawj mbouj hwnj gyoengqdou, danghnaeuz mboujmiz gyoengqdou, aen ci mwngz engqgya uq!” Coenz vah neix baez dingz, seiqhenz yiengj hwnj sing bek fwngz gig gok, gyoengqvunz foenfoen coeg naeuz

boux hauxseng haenx, boux hauxseng haenx baez najhoengz, vut coenz vah ndeu naeuz: “Suenq lo, suenq gou boihseiz, mbouj caeuq mwngz gangj baenzlai.” Gangj sat le, ganjvaiq ndonj haeuj ndaw ci bae, hai deuz lo. Seizneix, fajnaj gou caemh gig ndat: Dwg ha, daxmeh vihliux mbouj hawj gyoengqdou ngoenznaengz swnghhoz youq ndaw nyapnyaj, gaiq gunghcoz de dwg boux ndeu uq vuenh daeu haujlai vunz cengh ha! Nanzdauh gou lij yawj mbouj hwnj daxmeh la? Gou lij dwg dahlwg de lwi? Gou mbouj caiq ngeix baenzlai, sam yamq guh song yamq byaij daengz dangqnaj daxmeh. Daxmeh baez raen gou, doeksaet dwk naeuz: “Mwngz daeu gizneix guh gijmaz?” Gou nyaenx mbouj ndaej lo, daej dwk got daxmeh naeuz: “Meh, gou loek lo, mbouj wnggai yawj mbouj hwnj mwngz, yienzliengh gou, ndaej lwi?” Daxmeh itmienh swk raemxda hawj gou, itmienh naeuz: “Dah lwg huk gou, daxmeh caengz huj mwngz gvaq, gaej daej lo, mboujnex yakyawj lo, yienghhaenx, daxmeh couh mbouj gyaenz mwngz lo.” Dingq gij vah daxmeh le, gou sikhaek swk cengh raemxda, doiq daxmeh naeuz: “Gou caeuq mwngz itheij sauq ba!” “Ndei!” Daxmeh han naeuz. Gyoengqvunz gvaengz haenx youh bek fwngz hwnjdaeu, boux vunzlau ndeu naeuz: “Dahnuengx ha, meh mwngz gig fucwz, cijaeu dwg de hwnjban, gizdieg neix cungj dwg seuqsaksak, hawj vunz gamjdaengz sim gig langh. Mwngz ndaej lijgaij daxmeh dwg deng lo.” Gyoengqvunz cungj yaengx hwnj lwgfwngz meh, mwh haenx, gou gamj-daengz gig miznaj, gaem sauqbaet caeuq daxmeh itheij sauq hwnjdaeu

Seizneix, gwnzsingz lajmbanj cungj guh “singzyangh cingheez gungcwnz”, daxmeh engqgya nyaengq lo, gou gingciengz naeuz de, hawj de lai yietbaeg, daxmeh cungj naeuz: “Mbouj youqgaenj, aen singz raeuz bienq ndaej seuqcengh gyaunde, gou sim cij onj!” Dingq coenz vah neix, gou engq boiqfug daxmeh !

(指导老师:黄素艳)

Moixdang bouxwnq gangj daengz duz malwg seiz, gou couh siengj hwnj doengzdoh ndei gou “daeghenj”, gou youq ndaw sim nambdabed: “Daeghenj”, mwngz youq gizlawz, mwngz seizneix baenzlawz yiengh la, lij geiq ndaej naj gou lwi?

“Daeghenj” yenzlaiz dwg duz malwg ranz daxda gou. De gig dwggyaez, lwgda youh ndaem youh ndongq. De daengx ndang bwn henj-rwgrwg, ndang bizbwdwd, byaij loh hwnjdaeu niuj bae niuj dauq. Bingzseiz, dujrwz de boeb dauq laj, hoeng baez dingqnyi sing’ yaem couh sikhaek daengj hwnjdaeu, “vang vang” dwk raeuq mbouj dingz.

Moix baez gou bae ranz daxda, daeghenj yawjraen gou, couh angq dwk diuqbwngbwn, de au song cik galaeng ndwn dwk, song cik nyauj naj caeuq gou doxgaem, yienghceij dwggyaez raixcaix. Seizneix, gou couh dawz gij ndok miz di noh de cei gyaenz gwn haenx hawj de gwn, de

Daeghenj, Gou Siengj Mwngz

阿黄，我想你

贵港市覃塘区蒙公乡高占小学五年级 韦昌昊

gamz gij ndok couh buet bae henz rongz iq swheij menhmenh gwn hwnjdaeu lo.

Daeghenj gig roxsoq, baez yawjraen vunz mbouj sim’ angq seiz, de couh caemrwg dwk boemz youq giz ndeu, di hix mbouj doengh, cij au lwgda rox gangjvah haenx yawj mwngz, lumjbaenz lawh mwngz faendan gij yousim. Miz seiz, gou miz simsaeh couh lwnh hawj de, de lumjbaenz dingq ndaej rox, iet fajnyauj iq daeu lumhlumh gou, yaepyet, gou roxnyinh simcingz bienq ndaej ndei lai lo, gou engqgya gyaenz

de. Danghnaeuz miz mboengq ndeu mbouj raen daeghenj, gou couh siengjniemh de.

Doeklaeng, daxda gou gvaqseiq lo. Daeghenj mbouj raeuq lo, hix mbouj siengj gwn doxgaiq lo. Aenvih itcig cungj dwg daxda gueng de, de roxnaeuz mbouj sibgvengq lingh boux vunz gueng de ba, ndigah de menhmenh byoem bae lo, de lumjbaenz gig siengjniemh daxda. Daxdaiq raen de gig hojlien, couh dawz de soengq hawj bouxwnq lo. Gou rox le, siengsim raixcaix, lumjbaenz saet bae boux doengzdoh ndei lo.



Gou siengj: Roxnaeuz baezlaeng caiq hix yawj mbouj raen daeghenj lo, mbouj rox de lij geiq mbouj geiq ndaej gou dem. Hoeng gou maqmuengh de youq ranz bouxcawj moq gvaq ndaej engq ndei!

(指导老师:覃雪芹)